

得耕堂政書

第十四冊

退耕堂政書卷二十九目錄

奏議二十九

驗收京張鐵路工程情形摺

整飭津浦鐵路情形摺

津浦鐵路指定隄頭地方設立天津總站片

籌還度支部贖路借款備撥海軍經費摺

遵議設立密雲電局摺

遵議東三省借款築路摺

郵傳部第二屆籌備憲政成績摺

會擬陸海軍鐵路運輸章程摺

吉長鐵路開工日期片

遵旨派員查辦粵路弊混摺

湖北賑糶米捐請 飭仍照原案支付摺

請明定竊毀鐵路要件治罪專條及承緝處分摺

添設鐵路巡警片

請給發獎牌以勵勤能摺

汴洛鐵路裁併員司更定職掌摺

退耕堂政書卷二十九

天津徐世昌

奏議二十九

驗收京張鐵路工程情形摺

奏爲京張鐵路工竣開車謹將驗收工程情形恭摺仰祈

聖鑒事竊臣等前往張家口驗收京張鐵路工程於本年八月初二日附片奏明在案臣等遵於初六日率同該路總會辦詹天佑關冕鈞等馳赴該處逐段勘視行抵張家口後官商紳庶咸感戴朝廷眷顧邊陲爲民興業之深仁夾道歡呼異常鼓舞臣等復延見商會人等討論商務考求物產土宜爲擴充運銷之計並履勘雞鳴山煤鑛於初九日回京查該路起自豐台經都城至張家口光緒三十一年由前督辦臣袁世凱胡燏棻奏准興修聲明專用

華員經理計自三十一年九月開工至本年八月告成全路長凡三百五十七里連岔道計長四百四十九里有奇自豐台迤東柳村至南口長九十三里爲第一段自南口至岔道城長四十里爲第二段自岔道城至張家口長二百二十四里爲第三段南口岔道城之間崗巒重疊澗谷紛歧峭壁參天崎嶇險峻原勘以居庸關一帶阻隔官溝擬築大橋傍山直上穿越關城又因坡度過陡終慮行車出險嗣經再三勘測乃始定爲今綫削高填深循溝築隄開洞以通平原遠山以取彎道其斜度每三丈得一尺車行較穩又八達嶺山洞原擬由石佛寺洞向西北直行須鑿洞六千餘尺今改向東面斜行就青龍橋關峽設站洞工止三千五百八十八尺省費實多開洞之時南北兩面同時內攻復由山頂開井縋工下鑿閱十八月始克竣事至今按圖循覽猶備見當時圖始之艱

過岔道城以北又有蛇腰灣老龍背鷄兒梁等處或傍山臨河或
徑紆壁峭不減第二段諸工之險綜計全路車站十四月台二十
八橋梁一百二十五涵洞二百一十山洞四計積長五千三百九
十七尺此外有水塔十一機車廠五鐵磨盤六養路工房八十三
工員辦公室十二與原估數目大致略同其餘天橋一抽水機房
一地磅二井十一煤台五料廠四工程車務廠務員役工匠及巡
警各住房八十六皆原估所未有又以南口爲適中之區於其地
設製造廠一材料廠一並設旅館以待行人均能布置完備結構
合法此該路工程之大概情形也至該路自逐段行車以來業置
有機車十九輛客車貨車料車凡三百二十輛視原估車輛之數
已有加增將來客貨暢通尙須陸續添置以期利便再此路爲我
國鐵路北幹之起點居庸關岔道城二處漢唐以來歷經百戰夙

稱天險鳩庀之初外人每忖華員不克勝任邇來士夫遠來看視
嘖嘖稱道僉謂青龍橋鷗兒梁九里寨三處省去洞工實爲絕技
原奏本定於光緒三十八年竣工嗣臣部恐閱時過久糜費鉅而
收效遲於光緒三十三年十二月奏請提前撥付鉅款加工建築
預計亦須明年始克告藏仰荷

聖明主持於上調度款項併力經營得以從速集事在事員役工
匠同心協力剋期觀成且比年動工購料迭有加增而支出所需
尙在原估之內凡此數端皆非始願所及該路總辦道員詹天佑
總司工程學優識定經營締造獨任其難會辦道員關冕鈞辦理
購地行車管理規則各事精心毅力數載勤劬各段工程司暨執
事各員亦皆知此爲

國家完全自築之路卽爲我國工程司工業名譽所關奮勉圖終

創成鉅業均屬異常出力擬援照京奉京漢工竣奏獎成案仰懇
天恩俯准優給獎敘俾昭激勸以仰副

朝廷興業勸工之至意所有驗收京張鐵路工程緣由理合恭摺
具陳伏乞

皇上聖鑒訓示

整飭津浦鐵路情形摺

奏爲整飭津浦鐵路情形恭摺具陳仰祈

聖鑒事竊臣等奉

命辦理津浦鐵路事務當將接收關防日期並接辦情形奏明在
案臣等卽於七月初二日前往天津親赴北段路局詳細查勘臣
世昌於初三日回京臣雲沛於初四日由津啟程前往德州所有
沿路各段工程均經逐一履勘旋於十二日回京凡應行整頓事

項綜其大要厥惟審擇用人慎重款項督催工程稽核材料四大端而仍以用人爲最重苟得其人則人存政舉不求效而效自見苟非其人雖有良法美意亦未必見諸實行臣等再四思維當經遴派熟悉路政人員先行接收委令試辦如果勝任再行奏派該局總辦以昭慎重至該局所用員司得力者固不乏人而濫竽充數者亦復不可枚舉當將全局人員嚴行甄擇凡無關緊要之差使及聲名素劣辦事未能得力者概從淘汰計裁撤六十餘員其充當繙譯醫官繪圖測量電報電話各員亦經責成該局一體考驗如有程度較低不克勝任者立即擯斥另行考選此外如洋工程司等其薪水較優而責任較重者均各訂有合同計共七十二員其薪水無多責任較輕而並無合同者計共十四員從前輿論皆以雇用洋員太多動相詬病臣等體察情形訂有合同者未便

無故撤退未訂合同者即使全數革除節省亦復有限現經飭令該局轉飭總工程司將各洋員鐵路畢業文憑或曾在他路辦事實有經驗確據彙送考核如有名實不符以及違背規則情事當分別酌核辦理此臣等嚴核用人之大略情形也全路撥用款項按照原定合同凡英德銀行所存金鎊項下係由督辦大臣知照銀行撥匯來華聽候支用其存在上海天津英德銀行銀兩項下係由南北兩局總辦出具支取憑單隨時撥用前督辦臣呂海寰亦曾先事預防飭由該兩局先行稟報方准支用以銀公司堅執合同未能切實辦理是以前北段總辦已革道員李德順任意撥款不知檢束自取咎戾致遭指摘臣等接辦以後卽與英德兩銀行妥商凡南北兩局用款在一萬兩以上者非經督辦大臣核准知照銀行雖有憑單不能應付該銀行均各承認又查北局動用

款項向由總工程司開單送該局總辦簽字惟款目繁多帳單複雜路款由息借而來應如何詳加稽核以期徵實設立總核算員專司鉤稽各項單據分別准駁嚴防弊混另派妥員充當收支專司出納取具保單如有不實不盡情事卽由保人賠償似此嚴定限制此後當可無濫支之弊至於全路用款皆憑報告以爲徵信現飭由各該局先造預算清單再呈送月報季報分別門類造具表冊俾便預籌而資考核此臣等慎重款項之大略情形也全路工程按照合同限以四年告竣查開辦至今已經一年有半現在北段工程由天津以至德州沿途軌道雖未一律鋪竣而趕緊築造大約數月後可以開車增添進款德州至濟南一路土石各工均已逐段興修而濟南之濼口鎮工程車輛已能行駛刻正嚴切飭催以期迅速其濟南至嶧縣一路工程亦經飭令從速購地將

來卽以津德辦工人員移往濟嶧一路接續辦理南段工程由浦口以至滁州由滁州以至鳳陽劃分兩段土工業經完竣現正鋪設軌道惟今年春夏之交大雨時行水勢暴漲已成各工雖未大受損傷而第三四兩段土工不無因而遲滯現值秋令晴爽業已飭令趕辦一面仍派熟悉工程人員分赴南北兩段詳細察勘並飭查淮河橋工以備審核總之借款築路早一日告成卽少一日損失此整飭工程一事臣等不能不兢兢致意者也若材料一項所有訂購華洋兩項辦法均已載在合同惟未購以前自應預爲審察舉凡良窳不齊之品皆須按照工程酌用不得濫用賤料以致誤工亦不得故用貴料以致壓本經飭於兩月以前呈送料單非經核定之後不得擅自購用已購到之材料經理收發尤宜認真從前經收材料皆係洋員現已遴派華員總司其事所有一切

正三十一
損失偷竊等弊嚴行禁絕至材料運往工次向係招商包運茲經派員考查船價雇船自運較商價可以節省一倍有餘嗣後卽統歸委員承辦庶期核實此臣等整飭材料之大略情形也以上四項皆爲路政大綱節經次第施行至於裁併濟南德州購地兩局並裁撤臨淮稽查分局以節糜費業經分飭辦理所有一切事宜皆由北段入手南段距京旣遠先於重要大端遙爲轄制俟北段布置就緒臣等再赴南段親自巡察按照北段辦法以次舉行藉期仰副

朝廷鄭重路政之至意再接管款項數目前督辦臣呂海寰以英德兩京帳冊未齊各段工程報告仍有往復查詢之處業已飭催算結應俟劃清數目知照後再行具奏合併聲明所有臣等整飭津浦鐵路情形理合恭摺具陳伏乞

皇上聖鑒訓示

津浦鐵路指定隄頭地方設立天津總站片

再津浦北段路工開辦年餘而天津總站地址迄未安定從前所擬之南開地方因已革道員李德順藉便營私激成公憤經前督辦臣呂海寰擬改建於城北之趙家場臣等悉心籌畫竊以天津總站爲全路總匯之區設站之地關係全國交通必須得轉輸四達之宜不僅爲商市一隅之計除南開一處旣不相宜應毋庸置議外臣等當於八月初三日前往天津會同直隸督臣端方親赴城北趙家場及隄頭一帶逐加履勘查趙家場地勢低窪且難展拓現在該處旣未動工自可毋庸遷就隄頭地勢高曠距津北繁盛市場亦不甚遠與京奉鐵路新站較易接連交通旣屬合宜接軌亦可省費詢之熟悉路政華洋各員咸以該處設立總站最爲

利便臣等於此事本無成見第以全路扼要所在亦不敢曲徇人言當與督臣端方切實商確意見相同復證以紳商輿論亦無異議當經飭令北段路局卽就指定隄頭地方設立天津總站迅速圈定地址剋日興築以重要工謹附片具陳伏乞
聖鑒

籌還度支部贖路借款備撥海軍經費摺

奏爲擬定如期歸還度支部贖路借款以備撥充海軍經費恭摺具陳仰祈

聖鑒事竊准度支部咨稱本部奏籌撥海軍處經費一摺奉

諭旨著照該部現籌數目暫爲撥付等因欽此咨行遵照前來原摺內稱查有部庫供給郵傳部贖路項下規平銀五百萬兩應自宣統三年起至宣統七年止分年陸續歸還擬俟歸還後全數提

作海軍開辦經費等語查臣部因贖回京漢鐵路籌借度支部官款五百萬兩經於光緒三十四年九月間兩次奏陳奉

旨允准在案當時與度支部訂明係分五次歸還截至宣統七年清訖現在既經度支部奏明俟歸還後撥充海軍經費臣部自當竭力措集如期交付以應要需倘京漢餘利尙有不敷卽由他項設法挪撥統俟臨時斟酌情形再行妥籌辦理總期不誤原定期限爲主理合先行陳奏藉慰

宸廑所有覆奏如期歸還度支部借款備撥充海軍經費緣由謹恭摺具陳伏乞

皇上聖鑒

遵議設立密雲電局摺

奏爲遵

正
旨議奏事內閣鈔出密雲副都統德麟奏密雲滿城請接綫設立
電報分局一摺宣統元年八月三十日奉

硃批郵傳部議奏欽此欽遵到部原奏內稱電報循密雲而過局
設古北口距密城百里之遙每遇部署司局電報至該局譯訖折
回又逆行百里始達密城求速反緩深恐貽誤軍機請

旨飭下北洋大臣派一電生攜帶機器來密添設枝綫電局等語
臣等查古北口等處電綫係由北洋籌款設立專爲收發官報之
需茲該副都統擬請在密雲滿城添接枝綫係爲迅遞官報慎重
邊防起見自當照准辦理所有需用桿綫鉤料並修養經費爲數
無多卽由北洋大臣核實開支歸併北洋官電案內報部核銷以
昭劃一至該處應否設立分局或改爲報房以期撙節之處應由
北洋官電局酌核情形辦理所有遵議緣由理合恭摺覆陳伏乞